

De

*Philosophia Electiva priscis modernisq;
cultoribus.*

I.

Quod si quem approbantium [authoritas commovere magis, quàm rationum pondus & argumentorum evidentia possit, ei sanè, sive priscorum exempla & suffragia exosculetur, sive recentiorum sequi consilia & statuta malit, utroq; nomine se commendabit Electiva Philosophandi ratio. Quamvis enim Introductorem hujus plerique laudent *Potamonem Alexandrinum*, qui Cæsaris Augusti Tiberiiq; temporibus floruit, quemq; postea secuti sunt, *Sotion* Senecæ Præceptor, *Ammonius* Plutarchi Magister, aliiq; plurimi; indubium tamen est ipsa sectarum antiquissimarum Capita eandem si non professos, secutos tamen jam olim fuisse. De *Pythagora* certè prolixè ostendit Eruditissimus Vosius de Philos. Sectis cap. VI. eum Philosophiæ suæ partem unam Thracibus, aliam Ægyptiis sacerdotibus, ac nominatim Sanchidi Ægyptio Archiprophetæ, ut eum nominat Clemens Alex. in 1. Strom. partem etiam Persarum Magis & Chaldæis, nonnullam quoque Judæis, aliquam denique Græcis, imprimis Pherecydi Syrio, debere. *Democritus* in Philosophia πένταδλ^α habitus, ut ait Laërtius, præter Ægyptios, Chaldæos, ac Persarum Magos, etiam Indorum Gymnosophistas, amore Philosophiæ, adiit, teste Æliano Lib. IV. var. Histor: atomos autem & inane spatium infinitum à Leucippo accepit. Ex Platone quoque nobis allegat laudatus antè Vosius Cap. XXI. loca compluria, quæ, ne actum ageremus, huc transcribere nolimus, id consilii, quod Potamon postea apertius est professus, apprimè suggerentia.

D 3

II. Ipsum